



Per la scena d'entschatta e finala ei il chor dils scolars e scolarets vegnius sin tribuna.

FOTOS A. BEELI

Da Culan e Crestaulta

Scola e scoletta Castrisch-Sevgein han presentau il musical «Culan da Crestaulta»

DAD AUGUSTIN BEELI / ANR

■ Il roman da Toni Halter «Culan da Crestaulta» s'aida tier ils classichers dalla litteratura da giuventetgna. Vendergis sera han ils 56 affons dalla scola e scoletta da Castrisch-Sevgein presentau l'inscenaziun en fuorma da musical. Avon otg onns haveva la scola primara da Vuorz/Andiast presentau il toc. Vendergis ha la scola da Castrisch-Sevgein envidau da mirar la producziun. Igl ei in teater da Jacob Pfister cun musica da Gieri Spescha. Ils dus scolasts han fatg l'inscenaziun tenor il roman «Culan da Crestaulta» da Toni Halter ch'ei cumpariu igl onn 1955. La historia tracta dil temps da bronz. A Crestaulta e las culegnas vischinontas Crapfess e Pilac lavuran ins e drova uaffens da crap. Igl ei il temps ch'ins stueva temer ils lufs, ils dieus, e ch'ins mirava il cuors dil sulegl. Il giuven herox Culan, fegl da Hardin e da Dursa, ei sin buna via da daventar in gliard e curaschus catschadur. In sco quei che siu bab Hardin fuvu. Lez fuvu mai pli turnaus a casa dalla catscha da camutschs cun Ischga. El seigi daus sur ina preit-crap giu, han ins raquintau a Crestaulta. Il losch catschadur Ischga ei ambizius, fetg ambizius, el vul daventar cauvtig.

Vendergis sera ella halla plurivalenta a Sevgein ein quater generaziuns s'entupadas, duas da quellas enonuschevan il roman da Toni Halter, la tiarza e quarta generaziun denton buc. Pils 56 affons ch'ei sepresentai eis ei stau ina biala experientscha da tractar il temps dils emprems carstgauns ella vallada. Scolasta Andrea de Groot-Veraguth e scolast Gion Gieri Sgier han realisau il project cun sustegn digl en-



Il retuorn a Crestaulta: Culan porta ella culegna il bronz.

tir team da scola. La scolasta da coeduaziun Martha Giger ha denter auter giu d'organisar e cuser costums per 56 affons.

Ina inscenaziun da tala dimensiun ei buca semplia da realisar. Glisch, tun e tecnica da projecziun ston funcziunar e far effect. Tut ha lu era funcziunau perfetg. La squadra dalla scola Castrisch-Sevgein ha realisau quei project culs scolars da Castrisch, Sevgein, Riein e Luven. Ils affons han giu d'emprender texts e vitier diesch canzuns. Duront las 21 scenas ha il chor d'affons cantau melodias che van ell'ureglia. Ils affons dalla scola primara, scola Depuoz e scoletta han veramein dau tut ed incantau il publicum. Els han discurreu dad ault e bein capeivel, han era schau sentir nuot dalla nervusadad.

Sesend egl auditori han ins saviu suandar scena per scena. Co Culan ha stuiu fugir perquei ch'ins leva unfrire il sil caset per quietar ils morts. Duront la fiasta da pri-

mavera cul trer schibettas haveva el clamau il num da siu bab Hardin permier. Clamar ils morts fuvu scumandau e muntava ch'ins vegni sil crap d'unfrenda. Durana, la matta che Culan carezava, ha liberau el. Ils aspectatur han saviu prender part dall'aventura, co Culan ei fugiu a Crapfess tier siu tat Hago. Lez ha cussegliu da bandunar la vallada e dad ir giu spel grond lag tier Agrun. Ell'inscenaziun han ins empriu d'enonuscher las autras figuras. Il herox ha adina giu ils dieus dalla glisch da sia vart, igl ei schizun gartegiau ad el da sedeliberar dalla sclavaria.

Il Culan da Crestaulta da Jacob Pfister e musica da Gieri Spescha vegn a restar en memoria sco project communabel cun effect durabel. Igl auditori spera lu era ch'ei detti zacu puspei in tal. Projects da tal gener valan nungetg bia, per convivenza, integraziun, pedagogia e buc il davos per la cultura romontscha.



Ils marcadonts han pigliu Culan, el vegn menaus en sclavaria.



Ell'emprima part ha Selina Derungs giugau la rolla da Culan.



Culan lai encescher: Duront ina dallas scenas cul cant dallas scolaras.



In toc ritmic cun pitgar: Ils affons duront la scena dils sclavs ella mina d'iom.



Scolars e scolarets fuvan empau nervus, han denton cantau cun vigur tuttas diesch canzuns.



Culan tiel cauvtig Ahur, davostier projectau igl intern dalla tenda.